

Službene novine FBiH 26/07

Na osnovu člana 74. Zakona o cestovnom prijevozu Federacije Bosne i Hercegovine ("Službene novine Federacije BiH", broj 28/06), federalni ministar prometa i komunikacija donosi

PRAVILNIK

O IZMJENAMA I DOPUNAMA PRAVILNIKA O NAKNADAMA ZA TEHNIČKI PREGLED VOZILA I DRUGIM POSLOVIMA KOJI SE OBAVLJAJU U STANICAMA ZA TEHNIČKI PREGLED

Član 1.

Član 5. stav 1. alineja 2. Pravilnika o naknadama za tehnički pregled vozila i drugim poslovima koji se obavljaju u stanicama za tehnički pregled ("Službene novine Federacije BiH", broj 51/06) (u daljnjem tekstu: Pravilnik), mijenja se i glasi:

- "dijela naknade za obavljanje poslova jedinstvenog sistema tehničkih pregleda koji pripada Stručnoj instituciji, Budžetu Federacije Bosne i Hercegovine i budžetima kantona, kako je to određeno članom 7. ovog pravilnika."

Član 2.

Iza člana 6., dodaje se novi član 6a., koji glasi:

"Član 6a.

Uplata cijene usluge za obavljeni tehnički pregled može se vršiti

- žiralnom uplatom putem platnog naloga ili
- uplatom u gotovini na blagajni stanice.

Stanica može otvoriti poseban transakcijski račun na koji će se vršiti uplata usluga tehničkog pregleda vozila.

Za usluge tehničkog pregleda vozila naplaćene u gotovini na blagajni stanice, stanice su dužne voditi blagajnički dnevnik sa dnevnim evidencijom o izvršenim uslugama.

Kao potvrdu za uplaćenu uslugu tehničkog pregleda, stanice izdaju račun u četiri primjerka, od kojih dva idu stranki, jedan Federalnom ministarstvu prometa i komunikacija (u daljnjem tekstu: Ministarstvo), a jedan primjerak se ostavlja u dokumentaciji obavljenog tehničkog pregleda. Jedan primjerak računa služi stranki kao dokaz o izvršenoj uplati za uslugu tehničkog pregleda kod nadležnog organa za registraciju vozila."

Član 3.

Član 7. mijenja se i glasi:

"Član 7.

Naknada iz člana 6. stav 2. raspoređuje se tako da:

- 90% pripada stanici tehničkog pregleda,
- 8% pripada Stručnoj instituciji,
- 1% pripada Budžetu Federacije Bosne i Hercegovine i
- 1% pripada budžetima kantona.

Stanica može zaključiti ugovor sa bankom u kojem će precizirati da banke vrše dnevno pražnjenje uplaćenih sredstava na način propisan stavom 1. ovog člana i da se izvod dnevno dostavlja korisnicima naknada iz stava 1. ovog člana.

Naknada koja pripada Budžetu Federacije BiH uplaćuje se na račun Budžeta Federacije BiH, otvoren kod UPI banke d.d. Sarajevo, broj 1540011100661492 uz obavezno upisivanje vrste prihoda 722416.

Naknada koja pripada kantonalnim budžetima uplaćuje se na depozitne račune Budžeta kantona u kojem se stanica nalazi, u skladu sa odredbama tačke 20. "Računi javnih prihoda" poglavlje "I. Kantoni" Pravilnika o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine ("Službene novine Federacije BiH", br. 29/06, 46/06 i 8/07), uz obavezno upisivanje vrste prihoda 722424.

Naknada koja pripada Stručnoj instituciji uplaćuje se na poseban račun Stručne institucije, otvoren kod ABS banke d.d. Sarajevo, filijala Zenica, broj 1990510008145233.

Ukoliko Stanica ne zaključi ugovor sa bankom o dnevnoj raspodjeli uplaćenih sredstava, naknadu iz člana 7. stav 1. alineje 2., 3. i 4. ovog pravilnika, uplaćivaće stanica na pripadajuće račune iz st. 3., 4. i 5. ovog člana, prvog narednog radnog dana za prethodni radni dan.

Stručna institucija će sredstva iz stava 1. alineja 2. ovog člana koristiti isključivo za obavljanje poslova iz člana 76. stav 3. Zakona.

Sredstva dobijena na osnovu odredbi iz stava 1. alineja 3. i 4. ovog člana koristit će se u skladu sa Odlukom Vlade Federacije Bosne i Hercegovine, odnosno u skladu sa odlukama vlada kantona.

Stanica koja ne izvrši redovnu uplatu naknada u skladu sa odredbama stava 1. ovog člana, gubi pravo obavljanja tehničkog pregleda vozila do izmirenja zaostalih obaveza.

Procentualne vrijednosti dijelova naknade iz stava 1. ovog člana mogu se mijenjati samo izmjenama i dopunama ovog pravilnika na način i postupak istovjetan njegovom donošenju."

Član 4.

U članu 8. stav 2., iza riječi "Primjerke", na početku stava, dodaju se riječi:

"izvoda sa transakcijskog računa, odnosno".

Iza stava 2. dodaje se novi stav, koji glasi:

"Prvog radnog dana naredne sedmice, stanice Ministarstvu dostavljaju izvod o raspodjeli naknada za usluge tehničkog pregleda i po jedan primjerak računa naplaćene usluge za svaki obavljeni tehnički pregled za prethodnu sedmicu. Za pravilnost uplate odgovornost snosi stanica."

Član 5.

Ovaj Pravilnik stupa na snagu narednog dana od dana objavljivanja u "Službenim novinama Federacije BiH".

Broj 01-27-322/07
3. aprila 2007. godine
Mostar

Ministar
Nail Šećkanović, s. r.